

Hoben musico Chris Kross:

“E ta un honor di por forma parti di e bunita Proyecto Hoben y Talentoso”

ORANJESTAD - Dos aña pasa a cuminsa cu e proyecto Hoben y Talentoso unda ta duna reconocimento na nos asina yama “Role Models” local. E ‘Role Models’ hoben t’ey pa inspira tur otro hoben di nos pais.

Un rol model ta pone su curason y demostra cu tur cos ta posibel si abo kier logra un meta poni den bida. Pa cu esaki e sosten y apoyo di tur esunnan rond di bo ta di suma importancia cual a lo largo lo defini e éxito di bo persona. E rol model ta un fuente di inspiracion con pa cana miho pa alcanza cada meta, pero esaki mayoria biaha ta bay cu hopi sacrificio y sigur dedicacion.



Un di rol modelnan cu sigur ta destacando den e mundo di musica Arubano ta Chris

Kross. Pa Chris Kross e tabata un honor di por a wordo reconoci den e proyecto Hoben y Talentoso 2014. Pa Chris e tabata un sentimiento unico paso manera e mes a bisa, tin hende ta sigui bo desaroyo como hoben di cerca y esaki sigur ta algo di aplaudi. Manera cualkier otro hoben Chris tambe tin su plannan pa futuro. Mirando cu musica ta su pasion, e ta biba pa cada momento cu presenta. Na januari Chris lo continua cu su estudio den musica den exterior pa asina sigui amplia su conocimiento de e area. Actualmente Chris Kross tin 20 aña di edad y ya cu su 15 aña e la cuminsa toca den Ca-

ribbean Sea Jazz Festival na Aruba cual sigur tabata un logro unico pa su persona. Tambe Chris a actua den diferente otro festival na Aruba manera di Pasco y Himno y Bandera, sin lubida e conciertonan. E banda nobo Fuente, ta su logro mas recien unda

Chris Kross hunto cu algun otro musico manera Sigfried Hart, porcierto tambe reconoci den e proyecto Hoben y

Talentoso 2013 como tambe Susjaira Kerpens reconoci e aña aki y e gran maestro di musica, Ivan Quandus a lanta. E banda ta conoci pa toca ritmo di Aruba y di Caribe. Chris tabata tin su mensahe pa tur nos hobennan cu tin un soño tan anhela. “Boso sigui entrena duro, haci boso best, kere den boso mes y boso lo “make it” sigur”, e la finalisa bisando.

E hoben musico Chris Kross tambe lo forma parti di e All Star Band cu lo duna su presentacion e dia 4 di november proximo durante di entrega di e “Award Book Hoben y Talentoso 2015” den Cas di Cultura.

Pa esunnan cu kier sa un poco mas riba e proyecto Hoben y Talentoso por subi e facebook page na e link [facebook.com/hobeny talentoso](https://www.facebook.com/hobeny talentoso). □

